

羅槃颺提品第二十八(十四偈)

拘樓秦佛時 昔有起塔者
我時在彼住 其寺甚高大
興造此塔寺 我口呵譴之
是塔甚太大 何日當成就
可稍作功德 如是自立辦
既不多勞煩 塔寺亦速訖
用口說寔言 坐犯語罪報
命盡壽終後 便墮地獄中
從地獄得出 短小身玄醜
世世所生處 為眾所輕邈
迦葉佛世時 為烏鳥赤嘴
波羅奈中道 翱翔叢樹間
瞻見世光曜 比丘所圍繞
即順佛為禮 口出悲音聲

佛世尊所遊 波羅奈國時
每隨行出入 常繞向悲鳴
緣是所作德 來還得人身
逮見等正覺 無上之導師
得出為寂志 於釋師子所
已為無所著 清涼而滅度
羅漢得自在 六通大神足
名曰為持法 正真有辯才
一切眾聚會 聽聞我音聲
諸天及人民 一切皆歡喜
我作罪少耳 作福亦不多
皆獲其果實 所為二罪福
羅槃颺提尊 在於比丘僧
於阿耨達池 自說本所作